

Stori blanga Ola Speshalwan Klos (Papit Plei)

Balang: Ei, wujei yubin kam brom?

Ngarritjan: Worde. Aibin gibit miselp laif langa Jisas na.

Balang: Mi gudbinji bla yu, bat ai garra dalim yu mowa blanga Jisas.

Ngarritjan: Aibin libum det nogudwan laif na. Ai garram gudwan laif na.

Balang: Wotkain det laif? Im isiwana o adwan?

Ngarritjan: Im rait, bat det dibuldibul im trai stapam mi brom bolorumbat Jisas. Hau ai garra bidim det dibuldibul?

Balang: Yu garra lafta werrimon det speshalwan klos brom Dedi God.

Ngarritjan: Wujan shop ai garra baiyim detlot speshalwan klos?

Balang: Najing! Oni Dedi God gin gibit yu detlot speshalwan klos.

Ngarritjan: O! Wotkainaba klos im garram?

Balang: Wal im garram belt bat nomo blanga holdimap drajj. Im min det trubala wed blanga God, en wi garra oldei bilib en trastim im wed. En det dibuldibul nomo laigim det trubalawan wed. Sabi Jisas bin tok brom det wed blanga God langa Seitin!

Balang: Det speshalwan shet im meigim wi jinggabat bla Jisas en wen wi bolorumap Jisas en det trubalawei bla im, nomo enijing kaan ardim yu insaid langa hat (or insaidwei).

Ngarritjan: Tharran im brabli gudwan stori aibin lisin. Ai nomo nogudbinji na wen dibuldibul im trai trikim mi.

Balang: Ai garra dalim yu stori blanga det speshalwan but na.

Ngarritjan: Speshalwan but! Wanim bla?

Balang: Wal yu sabi hau detlot solja oldei werrimon olabat but redi blanga fait? Wal seimwei wi garra oldei jidan redi blanga dalimbat det gudnyus, dumaji det gudnyus na garra meigim pipul jidan gudwei. En det dibuldibul trai stapam wi brom dalimbat olabat blanga Jisas.

Ngarritjan: Worde! Trubala dijan! Wen wi bolurum Jisas im jis laik wi garra go blanga fait.

Balang: Yuwai! Dijan fait wi kaan luk! Oni Dedi God im albumbat wi. Orait, ai dalim yu nekstaim blanga det shild na.

Ngarritjan: Hau ai garra yusum det shild?

Balang: Wal wi garra oldei bilib brabliwei langa Jisas. Im na det shild en im stapam det dibuldibul brom trikibat wi en blanga dalimbat det gudnyus.

Ngarritjan: Ai rili wandim tharran! Enimo speshalwan klos, Balang?

Balang: Ai dalim yu blanga det speshalwan het.

Ngarritjan: Samtaim ai olweis jinggabat nogudbalawei. Hau det speshalwan het garra album mi?

Balang: Wal wi garra oldei jinggabat Jisas en wanim imbin dum bla seibum wi, en lagijat na wi nomo larram det dibuldibul deigimwei wi brom im.

Ngarritjan: Weit na. Detmatj klos blanga jinggabat! Mi ardim hed na.

Balang: Wal wi garram
Im det belt
Im det speshalwan shet
Im det speshalwan but
Im det shild
Im det speshalwan het

Ngarritjan: Maitbi desol laswan klos na! Ai...

Balang: Nomo! Wanmo deya! Im det bigbala naif. Ai dalim yu nekstaim blanga tharran.

Ngarritjan: Nomo! Nomo! Im bigwan det naif! Im mait kadim mi.

Balang: Det naif im min det trubalawan wed blanga Dedi God. Wen wi ridim en duwit langa det wed, im meigim wi jidan strongwan en det dibuldibul im braidin bla det wed.

Binijap

Im nomo adwan blanga bolorum Jisas dumaji God bin gibit wi dislot speshalwan klos. Wi garra oldei jinggabat blanga im en prei en yusum detlot klos na blanga album wi.